

GJALDSKRÁ

fyrir hundahald í Reykjavíkurborg.

1. gr.

Af hundum í Reykjavíkurborg skal Dýraþjónusta Reykjavíkur innheimta gjöld samkvæmt gjaldskrá þessari, sem ætlað er að standi undir kostnaði við framkvæmd samþykktar um hundahald í Reykjavík.

2. gr.

Við skráningu hunds skal innheimta gjald sem hér segir:

Skráningargjald kr. 2.000.

Árlegt eftirlitsgjald kr. 9.900.

Samtals: 11.900.

Fyrir hunda sem undanþegnir eru árlegu eftirlitsgjaldi skv. samþykkt um hundahald skal einungis innheimta skráningargjald kr. 2.000.-

3. gr.

Af skráðum hundum skal innheimta árlegt eftirlitsgjald kr. 9.900.

Heimilt er að veita allt að 30% afslátt af árlegu eftirlitsgjaldi hafi viðkomandi hundaeigandi sótt námskeið um hundahald sem viðurkennt er af Dýraþjónustu Reykjavíkur.

4. gr.

Við afhendingu handsamaðs óskráðs hunds ber að innheimta kr. 30.200 handsömunargjald.

Að auki skal eigandi greiða þann kostnað sem leggst á vegna dvalar eða geymslu viðkomandi hunds.

5. gr.

Gjalddagi samkvæmt 3. gr. er 1. mars og eindagi 1. maí ár hvert. Dráttarvextir reiknast frá gjalddaga séu gjöldin ekki greidd á eindaga. Um innheimtu gjalda fer samkvæmt 59. gr. laga nr. 7/1998 um hollustuhætti og mengunarvarnir.

6. gr.

Gjaldskrá þessi sem samin er og samþykkt af borgarstjórn Reykjavíkur, með heimild í 5. mgr. 59. gr. laga nr. 7/1998 um hollustuhætti og mengunarvarnir, með síðari breytingum og 24. gr. laga nr. 55/2013 um velferð dýra staðfestist hér með og öðlast gildi við birtingu. Um leið fellur úr gildi gjaldskrá nr. 1189/2016 fyrir hundahald í Reykjavíkurborg.

Borgarstjórinn í Reykjavík.

Dagur B. Eggertsson.

Umsögn

Viðtakandi: Borgarráð
Sendandi: Sviðsstjóri fjármála- og áhættustýringarsviðs
Efni: Tillaga að Dýraþjónustu Reykjavíkur (DÝR)

Óskað hefur verið eftir umsögn fjármála- og áhættustýringarsviðs um tillögu umhverfis- og heilbrigðisráðs, sbr. tillögu stýrihóps um þjónustu við gæludýr um að setja á stofn Dýraþjónustu Reykjavíkur (DÝR), dags. 11. nóvember 2020. Tillagan er eftirfarandi:

*„Lagt er til að umhverfis- og heilbrigðisráð og menningar- íþrótt- og tómstundaráð samþykki að sameina á einum stað, undir nafninu Dýraþjónusta Reykjavíkur (DÝR), starfsemi Reykjavíkurborgar vegna þjónustu við gæludýr.
DÝR skal annast utanumhald og umsýslu vegna skráningar dýra, fræðslu og upplýsingagjöf um gæludýr, dýrahald í þéttbýli og þær reglur sem um það gilda, föngun og vistun dýra í vanskilum, móttöku dýra í hremmingum, samskipti við aðrar stofnanir innan sem utan borgarinnar, dýraeigendur og hagsmunasamtök þeirra.
Samhliða stofnun DÝR verður Hundaeftirlit Reykjavíkur lagt niður og málefni katta flutt frá meindýraeftirliti til DÝR. Jafnframt er samþykkt að stofna starfshóp sem hefur það hlutverk að undirbúa stofnun DÝR og skila nákvæmum tillögum að verkaskiptingu ásamt innleiðingaráætlun, sem byggir á skýrslu stýrihóps um þjónustu borgarinnar við gæludýr og þeim tillögum sem þar er að finna.
Sviðsstjóra umhverfis- og skipulagssviðs, íþrótt- og tómstundasviðs og framkvæmdastjóra Heilbrigðiseftirlits Reykjavíkur er falið að vinna erindisbréf og skipa fulltrúa í starfshópinn.“*

Megintillagan felur í sér að sameina á einum stað, undir nafninu Dýraþjónusta Reykjavíkur (DÝR), starfsemi borgarinnar vegna þjónustu við gæludýr. Einnig eru settar fram tillögur með það að leiðarljósi að bæta umhverfi og þjónusta við dýr og dýraeigendur. Áætlaður viðbótarkostnaður vegna tillagnanna er áætlaður 6 m.kr. DÝR verður með starfsstöð í Fjölskyldu- og húsdýragarðinum á íþrótt- og tómstundasviði.

Tillögur stýrihóps	Nýr kostnaður	Útskýringar
Tillaga 1 Sameina á einum stað alla þjónustu við gæludýr undir DÝR		0 Flutningur á núverandi fjárheimildum
Tillaga 2 Uppbygging á hundagerði (lausagöngusvæði hunda)	8.000.000	Er þegar í fjárfestingaráætlun 2021 og 2022
Tillaga 3 Endurskoða samþykktir um dýrahald		0 Innanhús vinna
Tillaga 4 Einföldun skráningakerfis - rafrænt skráningarkerfi		0 Unnið á þÖN
Tillaga 5 Hundagjaldskráning - lækka gjald og einfalda		0
Tillaga 6 Samstarfs við frjáls félagasamtök - styrktarsjóður og þjónustusamningar	3.000.000	
Tillaga 7 Fræðsla, ábyrgð og skyldur (kynningarmál)	3.000.000	
Tillaga 8 Öryggi á blönduðum stígum		0 Hafa í huga við hönnun nýrra göngustíga

Umsögn FÁST

Tillaga 1:

Við stofnun DÝR er ekki gert ráð fyrir hækkun rekstrarkostnaðar. Fjárheimildir hundaeftirlitsins (kost.st U5250) flytjast frá umhverfis- og skipulagssviði yfir á íþrótt- og tómstundasvið að húsaleigu undanskyldri. Við tilfærsluna munu flytjast 2 stöðugildi á milli sviða. Frá meindýraeftirlitinu flyst 0,25 stöðugildi sem nemur um 3 m.kr.

Tillaga 2:

Uppbygging hundagerða upp á 8 m.kr. skiptist í 2 m.kr. í leiktæki og 6 m.kr. í stækkun og bætingu svæða. Samkvæmt ÍTR hefur þegar verið gert ráð fyrir þessum kostnaði í fjárfestingaráætlun Reykjavíkurborgar og fellur undir liðinn **20240 Leikvelli, torg og opin svæði** í fjárfestingaáætlun.

Tillaga 3:

Endurskoðun samþykktu um dýrahald verður unnin innhús og ekki er reiknað með auka kostnaði vegna þess.

Tillaga 4:

Ekki er gert ráð fyrir neinum kostnaði við að breyta ferlum og koma skráningum á rafrænt form. Þótt vinnan muni að mestu verða á borði þjónustu- og nýsköpunarsvið er hætta á viðbótarkostnaði vegna verkefnisins.

Tillaga 5:

Gert er ráð fyrir að gjaldskrá vegna skráningu hunda muni lækka vegna breyttra aðferða við skráningu. Ekki er ljóst hvert gjaldið yrði en líklegt er að auka þyrfti fjárheimildir ÍTR þar sem tekjur Hundaftirlitsins hafa ekki staðið undir kostnaði undanfarin ár. Kostnaðaráætlun 2021 gerir ráð fyrir 34.370 þ.kr. en tekjur hljóða uppá 33.800 þ.kr eða tap uppá 570 þ.kr. Tillögurnar gera ráð fyrir að aukning á skráningum standi undir lægra gjaldi. Til skamms tíma er ljóst að kostnaður borgarinnar hækkar við lækkun á gjaldskrá og því gæti verið betra að taka það mál aftur upp þegar reynsla er kominn á breytt og einfaldara skráningarferli.

Tillaga 6:

Gert er ráð fyrir 6 m.kr. vegna þjónustusamninga og styrktarsjóðs sem félagasamtök og aðrir sem láta sig dýravelferð máli skipta geta sótt í. Helmingur fjármagnsins 3 m.kr. er þegar í fjárheimildum umhverfis- og skipulagssviðs og munu verða fluttar til íþrótt- og tómstundasviðs. 3 m.kr. er nýtt fjármagns sem ekki hefur verið gert ráð fyrir í fjárhagsáætlun og væri eyrnamerkt nýjum styrktarsjóð.

Tillaga 7:

Lagt er til auknu fræðslu- og kynningarstarfi á DÝR, dýrahaldi í þéttbýli og velferð dýra. Kostnaðarmat er 3 m.kr. og er ekki gert ráð fyrir því í fjárhagsáætlun Reykjavíkurborgar. Ekki er útlistað nánar hvernig kostnaður skiptist.

Tillaga 8:

Hugað sé að dýraumferð við hönnun göngu og hjólastíga. Er vinnan unnin á umhverfissviði og ekki áætlaður kostnaðarauki.

Fjármála- og áhættustýringarsvið hefur rýnt kostnaðarmat vegna tillagnanna. Flestar tillagnanna gera ráð fyrir aðlögun og vinnu starfsmanna Reykjavíkurborgar þannig að kostnaður hljótist ekki af. Beinn kostnaðarauki er áætlaður 6 m.kr. vegna nýs styrktarsjóðs, fræðslu- og kynningarmála.

FÁST bendir á að í tillögu 4 og 5 sem fjalla um breytingar á skráningarkerfi hunda og það gert rafrænt auk þess sem skráningargjald verður lækkað er ekki gert ráð fyrir auknum kostnaði.

Ekki er hægt að gera ráð fyrir öðru en að verkefni vegna nýs skráningakerfis kosti talsvert eins og ávallt við vinnu, þróun og innleiðingu á öllum hugbúnaði. Þrátt fyrir að gert sé ráð fyrir að nýtt og/eða breytt skráningarkerfi verði undirbúið og unnið innanhúss, er mikilvægt að gera kostnaðaráætlun um undirbúning þess og innleiðingu og draga fram þann ávinning sem talið er að nýtt kerfi leiði af sér. Til áréttingar er bent á að það er verklag sem nauðsynlegt er að innleiða vegna allra hugbúnaðarverkefna sem farið er í af hálfu ÞON vegna rafvæðingar á skráningar-, umsóknar- og verkferlum.

Einnig er bent á að lækkun skráningargjalds mun sömuleiðis leiða til aukins kostnaðar til skamms tíma. Nú þegar má gera ráð fyrir að tekjuáætlun Hundaeftirlitsins standi ekki undir kostnaði vegna eftirlitsins og lækkun tekna því óráðleg. Tillagan gerir ráð fyrir að fjöldi skráninga aukist með breyttu verklagi, en það tekur tíma og því ljóst að minnsta kosti til skamms tíma þyrfti viðbótarfjárheimild.

Hugmyndin um betri nýtingu úrræða borgarinnar sem snúa að dýrum er góð og þjónusta á einum stað ætti að leiða til einfaldari og betri stjórnsýslu sem til langs tíma ætti að skila sér í hagkvæmari framkvæmd og lækkun kostnaðar. Þó er rétt er að benda á að ekki er verið að flytja alla starfsemi sem snertir dýrahald með þessari aðgerð þar sem málefni stærri dýra líkt og hesta, sauðfjár, nautgripa og fleira er ekki færð yfir til DÝR frá umhverfis- og skipulagssviði samkvæmt fyrirliggjandi tillögum. Samlegðaráhrifin og minnkun flækjustigs vegna málefna dýra eru því ekki eins mikil og annars gæti verið.

Halldóra Káradóttir,
sviðsstjóri fjármála- og áhættustýringarsviðs.